

四庫全書

史部

欽定四庫全書

史部

會稽志卷二

詳校官監察御史臣沈孫璉

檢討臣德生覆勘

總校官知縣臣楊懋珩

校對官編修臣盧遂

謄錄監生臣陳元熙

欽定四庫全書

會稽志卷二

宋施宿等撰

王

越之為國始於夏后帝少康之時封庶子於會稽以奉
守禹之祀至春秋定公時越始見於經哀公時越始來
初吳楚皆僭自王而越亦稱王允常勾踐之時越益大
與吳楚爭衡北伐齊晉又六世乃為楚所滅秦併天下
裂為郡縣至漢高帝時以閩君搖為越王王閩越故地

而以會稽等郡封劉賈為荊王賈既死無後漢復立劉
濞為吳王濞有會稽之地濞反誅國除為郡歷後漢至
三國時孫策孫權皆嘗封會稽侯孫氏之有江左實本
於此東晉咸和二年封琅琊王昱為會稽王興寧元年
復封昱為琅琊王食會稽宣城如舊而封昱子昌明為
會稽王昱即帝位是為簡文帝其後昌明又為儲嗣而
會稽之為王國猶不廢故內史領郡事而置邸建康孝
武太元六年作新宮帝移居會稽王邸是也太元十七

年乃徙封琅琊王道子為會稽王義熙元年封臨川王
子脩之為會稽王宋受禪罷會稽郡府而會稽復為郡
齊梁因之至陳後主乃封第八子莊為會稽王魏至周
齊皆遙封故不錄隋開皇元年文帝封子秀為越王未幾
徙封於蜀煬帝大業中封元德太子昭之子侗為越王
江左承西晉諸王開國並以戶數相差為大小三品陳
武帝受命自永定訖於貞明唯衡陽王昌特加殊禮命
至五千戶自餘大國不過二千戶小國則千戶隋唐以

下封建之制寢廢不復唐有天下太宗封子泰為越王
後徙封魏而封幼子貞為越王肅宗封子係為越王天
復元年五月以鎮東等軍節度浙東西道觀察處置等
使守侍中彭城王錢鏐為越王天祐元年改封吳王梁
開平元年進封吳越王龍德三年加封吳越國王寵以
古列國之禮後唐同光二年復申前命同光三年始受
封冊建國焉天成四年又以兩鎮節鉞及杭州越州大
都督府長史移授其世子元瓘以示優崇長興三年三

月王鏐卒諡曰武肅子王元瓘立晉天福六年九月王
元瓘卒諡曰文穆子王佐立開運四年六月王佐卒
諡曰忠獻弟王侁立未幾胡進思廢王侁與羣臣迎立
其弟俶漢乾祐元年王俶立是為忠懿王周顯德四年四
月亦嘗追封世宗長子宗誼為越王皇朝開寶二年申
命俶為吳越國王而命俶子惟濬為杭州越州大都督
鎮海鎮東等軍節度使太平興國三年四月俶朝京師
五月乙酉表獻所部十三州八十七縣詔以俶為守太

師尚書令兼中書令淮海國王唐李中原多故征伐自諸侯出故有天下兵馬大元帥之名已而藩鎮割據僭叛相仍唯錢氏守藩稱臣三世五主有國百年中更五代迄於本朝職貢未嘗少缺彼善於此猶為有足言者故歷序其本末云

本朝端拱元年四月詔改封冀王元份為越王嘉祐四年十二月追封豫王昕為越王英宗皇帝即位追封吳王德昭為越王徽宗皇帝命皇弟偁為太傅鳳翔山南

西道節度使鳳翔牧兼興元牧兼神霄玉清萬壽宮使
越王至欽宗即位授皇叔太師永興成德軍節度使雍
州牧兼真定牧越王越州秦牘公移於知州前列越王
銜下書在京二字雖扈從北狩猶仍其故至紹興十年
以後方省去

都尉

都尉漢秩二千石與太守等吾丘壽王為東郡都尉不
復置太守武帝賜之璽書曰任四千石之重是也越絕

外傳漢文帝前九年會稽并故鄣太守治故鄣都尉治山陰舊經云文帝九年山陰為都尉治蓋本於此然按漢制國置中尉郡置都尉當文帝時吳會稽皆吳王濞封國漢固不當為置太守都尉又漢紀景帝中二年秋七月始更郡守為太守郡尉為都尉則文帝時其官稱亦未應有太守都尉之號也漢書地理志云西部都尉治錢塘又越絕外傳漢文帝前十六年太守治吳郡都尉治錢塘故舊經云山陰都尉徙治錢塘而不及太守

徙治事通典云今金華縣漢烏傷縣地後漢末分為長山縣二漢置西部都尉然則西部固屢徙矣班固漢人不載西部徙治本末而越絕外傳獨載之詳如此何也又舊經云元鼎五年又立東部都尉治冶按武帝紀元鼎六年秋東越王餘善反殺漢將吏遣橫海將軍韓說等出會稽會樓船將軍楊僕等擊之元封元年東越殺王餘善降詔曰東越險阻反覆為後世患遷其民於江淮間遂虛其地兩粵傳功臣表皆云元封元年始平東越

其承誤如此通典云東部今臨海是也三國志太平二年二月以會稽東部為臨海郡按朱育云東部都尉治治陽朔元年又徙治鄞或有寇害復徙治句章然則東部亦屢徙矣又按西漢書地理志會稽郡南部都尉治回浦兩粵傳漢五年立無諸為閩越王主閩故地都治顏師古云即候官縣是也漢徙其人江淮間有遁逃山谷間者頗出立為治縣地屬會稽郡後漢改為候官都尉後復分治地為會稽東南二部尉

東部治臨海
西部治建安舊經

乃不載會稽南部都尉蓋疎畧也後漢紀順帝陽嘉元年海賊曾旌寇會稽殺句章鄞鄮三縣長攻會稽東部都尉按漢百官志建武六年省諸郡都尉并職太守無都尉之役古今注曰建武六年八月省都尉官應劭曰每有劇賊郡臨時置都尉事訖罷之又省關都尉惟邊郡往往置都尉及屬國都尉稍有分縣治民比郡都尉佐太守掌武職甲卒至此乃有分縣治民按建安十二年分東侯官之地為建安縣以屬南部都尉此殆是也

又安帝永初四年初置長安雍二營都尉官注云扶風都尉居雍虎牙都尉居長安獻帝即位省扶風都尉桓帝永壽元年初置泰山琅琊都尉官注云郡寇賊不息故置延禧五年罷琅琊都尉官八年罷泰山都尉官皆事訖罷之如應注云如屬國邊郡都尉其廢置亦書之甚詳蓋陽嘉元年會稽東部都尉亦臨事乃置事訖罷之初平中全柔以董卓之亂棄官東歸詔即拜為會稽東部都尉三國志蒯良張紘輩皆嘗為會稽東部都尉

亦以兵興後置也通典所載二漢置西部都尉理烏傷
後漢改治縣為侯官都尉又分治為東南二部凡此皆
不常置故其治亦往往屢徙至隋大業二年詔復置都
尉官大業七年勅都尉鷹揚與郡縣相知追捕羣盜後
此往往不復見云

內史

內史本周官其見於春秋者莊公三十二年周內史過
僖公十六年周內史叔興見於傳文公元年天王使叔

服來會葬見於經傳曰王使內史叔服來會葬之類是也秦因之掌治京師秦又置中尉掌徼循京師漢皆因之而不革高帝初置諸侯王地既廣大且至千里得自治其國有大傅輔王內史治國民中尉掌武職丞相統衆官羣卿大夫都官如漢朝漢為置丞相其御史大夫以下皆自置吳楚七國反景帝懲之令諸侯王不得復治國改丞相曰相省御史大夫廷尉少府宗正博士官損謁者郎中令太僕以下員秩武帝改漢內史為京兆

尹中尉為執金吾故王國內史中尉如故員職皆朝廷
為署不得自置成帝綏和元年又省內史更令相治民
加郡太守中尉如郡都尉皆秩二千石其紹封削絀者
中尉內史官屬皆以率減晉元帝渡江迺沿後漢郡國
之制建會稽以為國復前漢之舊置內史以治國民王
留京師而內史實行郡太守事受察於揚州刺史其後
會稽內史地望寔重故王述自前會稽內史擢為揚州
刺史而皇子道子為琅瑯王領會稽內史事宋永初二

年正月乃罷會稽郡府而內史復為太守

太守

會稽自秦置守漢因之其後更守為太守尉為都尉或以都尉行太守事在漢末三國時亦有以丞功曹行郡事者東晉改為內史至宋乃復為太守焉隋為總管復又改都督唐初亦沿隋制久之乃為浙東觀察使皇朝為知越州事中興初陞州為紹興府則又稱知紹興府事今掇秦漢太守以下姓名及行事之顯者著於篇

秦殷通二世元年會稽假守

漢嚴助會稽吳人武帝時拜會稽太守數年不聞問賜書曰制詔會稽太守君厭承明之廬勞侍從之事懷故土出為郡吏會稽東接於海南近諸越北枕大江間者閼焉久不聞問具以春秋對毋以蘇秦從橫助恐上書謝願奉三年計最

朱買臣字翁子吳人武帝時邑子嚴助貴幸薦為中大夫東越數反覆拜會稽太守上曰富貴不歸故鄉如

衣繡夜行今予何如買臣頓首謝詔買臣到郡治樓
船備糧食水戰具須詔書到軍與俱進初買臣免待
詔常從會稽守邸者寄居飯食及拜太守買臣衣故
衣懷其印綬步歸郡邸直上計時會稽吏方相與羣飲
買臣入室中守邸與共食食且飽少見其綬守邸怪
之前引其綬視其印會稽太守章也守邸驚出語上
計掾吏皆醉大呼曰妄談耳其故人素輕買臣者入
內視之還走疾呼曰實然坐中驚駭白守丞相推排

陳列中庭拜謁買臣徐出戶有頃長安廩吏乘馬
車來迎遂乘傳去將兵與韓說等俱擊破東越有功
入為主爵都尉

任延字長孫南陽宛人更始元年拜會稽都尉時年十
九迎官驚其壯及到靜泊無為唯先遣饋禮祠延陵
季子時天下新定道路未通避亂江南者皆未還中
土會稽頗稱多士延到皆聘請高行如董子儀嚴子
陵等敬待以師友之禮掾吏貧者輒分俸祿以賑給

之省諸卒令耕公田以周窮急每時行縣輒使慰勉
孝子就餐飯之吳有龍丘萇者隱居太末志不降辱
王莽時連辟不到掾吏白請召之延曰龍丘先生躬
德履義有原憲伯夷之節都尉洒掃其門猶懼辱焉
召之不可遣功曹奉謁修書記致醫藥吏使相望於
道積一歲萇乃乘輦詣府門願得先死備祿延辭讓
再三遂署議曹祭酒萇尋病卒延自臨殯不朝三日
是以郡中賢士大夫爭往官焉

第五倫字伯魚京兆長陵人建武二十九年拜會稽太守躬自斬芻養馬妻執炊爨受俸裁留一月糧餘皆賤賣與民之貧羸者會稽俗多淫祀好卜筮民常以牛祭神百姓財產以之困匱倫移書屬縣巫祝有依託鬼神詐怖愚民案論之有妄屠牛者吏輒行罰百姓以安永平五年坐法徵老小攀車叩馬號呼相隨日裁行數里倫乃偽止亭舍陰乘船去及詣廷尉吏民上書守闕者千餘人

慶鴻洛陽人慷慨有義節位至會稽太守所在有異蹟
張霸字伯饒蜀郡成都人永元中為會稽太守表用郡
人處士顧奉公孫松等並有名稱其餘有業行者皆
見擢用郡中爭厲志節習經以千數道路但聞誦聲
霸始到越賊未解郡界不寧乃移書開購明用信賞
賊遂束手歸附不煩士卒之力童謠曰棄我戟捐我
矛盜賊盡吏皆休

馬稜扶風茂陵人和帝時轉會稽太守治有聲

馬臻永和五年為太守創立鏡湖在會稽山陰縣兩界
築塘蓄水水高丈餘田又高海丈餘若水少則洩湖
灌田如水多則閉湖洩田中水入海所以無凶年其
陂塘周迴三百一十里都溉田九千餘頃會稽記云
創湖之始多淹冢宅有千餘人怨訴臻遂被刑於市
及遣使按覆總不見人籍皆是先死亡者然越人至
今廟祀之

殷丹為會稽太守時郡有孝婦以誣見殺連旱二年丹

到郡刑訟女祭婦墓天應時澍雨

成公浮為會稽太守久之徵還京師

劉寵字榮祖東萊牟平人拜會稽太守山民愿朴乃有
白首不入市井者頗為官吏所擾寵簡除煩苛禁察
非法郡中大化徵為將作大匠山陰縣有五六老叟
龐眉皓髮自若耶山谷間出人齎百錢以送寵寵勞
之曰父老何自苦對曰山谷鄙生未嘗識郡朝他時
吏發求民間至夜不絕或狗吠竟夕民不得安自明

府下車以來狗不夜吠民不見吏年老遭值聖明今
聞當見棄去故自扶奉送寵曰吾政何能及公言邪
勤苦父老為人選一大錢受之

陳業上虞人為會稽太守潔身清行志懷霜雪貞亮之
信同操柳下遭漢中微委官棄祿遁迹黔歛以求其
志高邈妙蹤天下所聞故桓文遺之尺牘之書比竟
三高

王朗會稽太守

孫策字伯符吳郡富春人建安二年詔策為騎都尉襲爵烏程侯領會稽太守

孫權字仲謀策之弟曹操表權為討虜將軍領會稽太守

顧雍字元歎吳郡吳人孫權領會稽太守不之郡以雍為丞行太守事討除寇賊郡界寧靜吏民歸服

吳吾粲字孔休吳郡烏程人黃武元年遷會稽太守

淳于式為會稽太守孫權遣陸遜討破丹陽賊帥遂部

伍東三郡強者為兵羸者補戶得精卒數萬人式表
遜枉取民人愁擾所在遜詣都稱式佳吏曰式意在
養民是以白遜

濮陽興字子元陳留人為會稽太守

樓玄字承先沛郡鄆人為會稽太守

滕胤字承嗣北海劇人為會稽太守所在見稱每聽辭
訟斷罪法察言觀色務盡情理

車浚天璽元年為會稽太守在公清忠值歲荒旱民無

資糧表求賑貸皓謂浚欲樹私恩誅之

郭誕孫皓時為會稽太守

晉紀瞻字思遠丹陽秣陵人愍帝時除會稽內史時有詐作大將軍府符收諸暨令令已受拘瞻覺其詐便破檻出之訊問使者果伏詐妄

諸葛恢字道明琅琊都人愍帝詔為尚書郎元帝以經緯須才承制調為會稽太守臨行帝置酒謂曰今之會稽昔之關中足食足兵在於良守以君有莅任

之方是以相屈恢曰天下喪亂風俗陵遲宜尊五美
屏四惡進忠實退浮華帝深納焉太興初以政績第
一詔曰會稽內史諸葛恢莅官三年政清人和為諸
郡首宜進其位班以勸風教令增恢秩中二千石
周札字宣季義興陽羨人遷右將軍會稽內史

虞潭字思奧會稽餘姚人明帝詔為冠軍將軍領會稽

內史徵拜尚書

事見人物門

何充字次道廬江灊人成帝時除建威將軍會稽內史

在郡甚有德政薦徵士虞喜拔郡人謝奉魏顗等以
為佐吏

孔愉字敬康會稽山陰人成帝時為鎮軍將軍會稽內

史加散騎常侍

事見人物門

孔安國字安國愉之子再為會稽內史領軍將軍

事見人物

門

王舒字處明丞相導之從弟成帝時將徵蘇峻出舒為
外援授撫軍將軍會稽內史秩中二千石舒上疏辭

以父名音雖異而事同求換佗郡於是改會字為鄒
舒不得已而行在郡二年而峻作逆假節都督行揚
州刺史事庾冰奔舒舒率衆俱渡浙江顧衆顧颺等
起義軍以應舒峻聞乃赦庾亮諸弟以悅東軍吳興
太守虞潭率所領屯苞亭並不敢進舒遣子允之以
精銳三千邀賊於武康破之斬首數百級賊悉委舟
步走時臨海新安諸山縣並反應賊舒分兵討平之
陶侃立行臺上舒監浙江東五郡軍事賊平以功封

彭澤縣侯

王允之字深猷舒之子咸康中為衛將軍會稽內史未到卒

王述字懷祖司徒渾之族穆帝時遷會稽內史莅政清肅終日無事

王愉字茂和述之子為會稽內史

王羲之字逸少司徒導之從子穆帝永和為右軍將

軍會稽內史

事見人物門

王凝之羲之之子左將軍會稽內史

江彪字思玄永和中為護軍將軍出補會稽內史加右
軍將軍

郗愔簡文帝輔政為輔國將軍會稽內史遷都督徐兗
青幽揚州諸軍事領徐兗二州刺史轉冠軍將軍帝
踐祚就加鎮軍都督浙江東五郡軍事因居會稽

謝玄字幼度爽之子孝武帝時授散騎常侍左將軍會
稽內史時吳興太守晉寧侯張玄之亦以才學顯自

吏部尚書與玄同年之郡而玄之名亞於玄時人稱

為南北二玄論者美之

事見人物門

謝琰字瑗度太傅安之子孫恩逃海島朝廷憂之以琰

為會稽內史都督五郡軍事

王蘊字叔仁孝武定皇后之父都督浙江東五郡鎮軍

將軍會稽內史加散騎常侍蘊素嗜酒及在會稽略

少醒日然以和簡為百姓所悅

劉牢之會稽太守

王薈衛將軍會稽內史

謝輔會稽人會稽內史

裴松之傳琅琊王茂之
會稽謝輔南北之望

虞嘯父征東將軍會稽內史

孔靖字季恭會稽山陰人以字稱虞嘯父為會稽內史
季恭求為府司馬不得及高祖定桓玄以季恭為內
史使齋封板拜授季恭便舟夜還至即叩扉告嘯父
並令掃拂別齋便入郡嘯父聞桓玄敗震懼請罪季

恭慰勉使安明旦乃移季恭到任務存治實勅止浮
華剪罰遊惰寇盜止境內清肅

宋孔生靖之子歷顯位侍中會稽太守

孔靈符靖之子為會稽太守豫章王子尚撫軍長史

劉懷敬彭城人武帝以舊恩累見寵授至會稽太守

謝方明陳郡陽夏人伯父吳興太守邈賊至被害方明

告邈門生義故掩討手自刃之時荒亂之後吉凶禮

廢方明合門過禍資產無遺營舉凶事平世備禮無

以加也永初三年為丹陽尹有能名轉會稽太守江東民戶殷盛姦吏蜂起符書一下文攝相續又罪及比伍動相連坐邑里驚擾方明濶略苛細務存綱領緩民期會莫敢犯禁除比伍之坐判久繫之獄東土至今稱詠之承代前人不易其政有必宜改者則以漸移變無迹可尋

褚淡之字仲原為會稽太守景平二年富陽縣孫氏聚合門宗謀逆其支黨在永興縣潛相影響縣令羊恂

率吏民拒戰力少退敗賊遂盤據直攻山陰淡之自假凌江將軍以山陰令陸邵領司馬王茂之為長史孔欣謝苓之並參軍事賊遂摧鋒而前淡之遣陸邵督帶戟公石綝廣武將軍陸允以水軍拒之又別遣行參軍漏恭期率步軍與邵合力淡之率所領出次近郊恭期等與賊戰於柯亭大破之

羊玄保泰山南城人景平間為會稽太守太祖以玄保廉素寡欲故頻授名郡為政雖無幹績而去後常見

思不營財利處家儉薄

孟顓字彥仲平昌安丘人元嘉中為會稽太守

張茂度吳郡吳人名與高祖同以字稱元嘉十八年除
會稽太守素有吏能在郡縣職事甚理卒官謚曰恭
子

竟陵王誕字休文元嘉二十六年授都督會稽東陽新
安臨海永嘉五郡諸軍事安東將軍會稽太守給鼓
吹一部元凶弒立以浙江東五郡立會州以誕為刺

史顧琛為太守

廬江王祿字休秀元嘉二十六年遷冠軍將軍為會稽太守世祖即位復為太守加撫軍將軍

顏峻為東揚州刺史

張裕會稽太守

張暢字少徵吳郡吳人為會稽太守卒官

孔顗字思遠會稽山陰人永光元年為尋陽王子房右軍長史加輔國將軍行會稽郡事

晉熙王昶字休道世祖時為東中郎將會稽太守尋監
會稽東陽臨海永嘉新安五郡諸軍事孝建元年立
東揚州即昶為刺史東中郎將如故進號右將軍
宗室思考被遇歷朝官極清顯為會稽太守

王翼之字秀弼琅琊臨沂人徽之之孫官至御史中丞
會稽太守

顧顗之孝建元年為義陽王昶東中郎長史寧朔將軍
行會稽郡事

沈懷文字思明王子尚鎮會稽遷撫軍長史行府州事
時囚繫甚多動經年月懷文到任讞五郡九百三十
六獄衆咸稱平

豫章王子尚大明三年以浙江東揚州命子尚都督揚
州江州之鄱陽晉安建安三郡諸軍事揚州刺史五
年領會稽太守東土大旱鄞縣多畊田世祖使子尚
至鄞縣勸農又立左學召生徒置儒林祭酒文學祭
酒勸學從事

松滋侯子房字孝良大明七年進號右將軍前廢帝元年遷東揚州刺史景和元年以右將軍督會稽東陽新安臨海永嘉五郡諸軍事會稽太守太宗即位改督為都督進號安東將軍太守如故

巴陵哀王休若泰始元年出為使持節都督會稽東陽永嘉臨海新安五郡諸軍事領安東將軍會稽太守張永字景雲明帝時討薛安都還徙會稽太守加都督蔡興宗明帝時遷鎮東將軍會稽太守加都督會稽新

安東陽永嘉臨海五郡諸軍會稽多諸豪右不遵王
憲幸臣近習參半宮省封畧山湖妨民害治興宗皆
以法繩之會土全實民物殷阜王公妃主邸舍相望
撓亂所在大為民患子息滋長督責無窮興宗悲啟
罷省又陳原諸逋負解遣雜役並見從三吳舊有鄉
射禮久不復修興宗行之禮儀甚整

江夏王躋字仲昇後廢帝時督會稽東陽新安臨海永
嘉五郡諸軍事東中郎將會稽太守進號右將軍

王僧虔為會稽太守中書舍人阮佃夫家在東請假歸
客勸僧虔以佃夫要幸宜加禮接僧虔曰我立身有
素豈能曲意此輩彼若見惡當拂衣去耳

洪規罷會稽郡太守無資不欲令人知其清乃以船載

土而歸

舊經

齊竟陵王子良字雲英昇明三年為會稽太守都督五
郡宋元嘉中皆責成郡縣孝武後徵求急速以郡縣
遲緩始遣臺使自此公役勞擾子良請息其弊子良

敦義愛古郡人朱百年有至行卒賜其妻米百斛蠲
一人給其新蘇

武陵王畢字宣昭建元二年為會稽太守加都督

顧憲之字士思吳郡吳人高帝時為東中郎長史行會
稽郡事郡人呂文度有寵於武帝於餘姚立邸頗縱
橫憲之至郡即表除之文度後還喪母郡縣爭赴弔
憲之不與相聞文度深銜之卒不能傷也遷南中郎
巴陵王長史

蕭靈鈞仕為廣德令梁高祖義師至行會稽郡事

蕭祗字敬式為東揚州刺史於時江左承平政寬人慢祗獨蒞以嚴切梁武悅之遷北兖州刺史

梁庾革字休野新野人高祖平京邑為輔國長史會稽郡丞行郡府事時承彫弊之後百姓凶荒所在穀貴米至數千民多流散革撫循甚有治理惟守公祿清節逾厲天監元年卒停屍無以殮柩不能歸高祖聞之賜絹百匹米五十斛

永陽王伯游字士仁天監元年督會稽東陽新安永嘉
臨海五郡諸軍事輔國將軍會稽太守

衡陽王元簡字熙遠天監三年遷會稽太守十三年入
為給事黃門侍郎

安成王機字智通天監六年為寧遠將軍會稽太守還
為給事中

邵陵王綸字世調天監十三年遷輕車將軍會稽太守
廬陵王續字世訢天監十三年會稽太守

武陵王紀字世詢天監十三年為會稽太守尋以其郡
為東揚州仍為刺史加使持節東中郎將徵為侍中
江革字休映濟陽考城人武陵王紀在東州頗驕縱上
乃除革長史會稽郡丞行府州事革門生故吏家多
在東聞革至並齎持緣道迎候革曰我通不受餉不
容獨當故人篚筐至鎮惟資公俸食不兼味郡境殷
廣辭訟日數百革分別辯析曾無疑滯人安吏畏百
城震恐琅邪王騫為山陰令贓貨狼籍望風自解王

憚之每侍讌言論必以詩書王因此耽學好文除都
官尚書贈遺一無所受送故依舊訂舫革並不納唯
乘所給舸舫艚偏欹不得安卧革乃於西陵岸取石
十餘片以實之其清貧如此

南郡王大連字仁靖太清元年出為使持節輕車將軍
東揚州刺史侯景寇京都大連率衆四萬來赴山賊
田頽羣聚黨數萬來攻大連命中兵參軍張彪擊斬
之

安陸王大春字仁經大寶元年出為使持節雲麾將軍
東揚州刺史

張彪貞陽侯即位以為東揚州刺史陳蒨軍至彪擊走
之蒨復遣周育等討彪斬之太平元年三月罷東揚
州還會稽郡

陳霸先字興國吳興武康人大寶二年湘東王承制授
使持節都督會稽東陽新安臨海永嘉五郡諸軍事
平東將軍東揚州刺史領會稽太守

陳舊字子華承聖三年討會稽太守張彪以功授持節都督會稽等五郡諸軍事宣毅將軍會稽太守

陳沈恪字子恭吳郡武康人永定三年除吳州刺史有詔追還行會稽郡事尋除散騎常侍忠武將軍會稽太守世祖嗣位進都督會稽東陽新安臨海永嘉建安晉安新寧信安九郡諸軍事鎮東將軍會稽太守未行改鎮南將軍湘州刺史

鄱陽王伯山字靜之光大元年為鎮東將軍東揚州刺

史太建元年徵為中衛將軍中領軍至德四年以中
權大將軍出為持節都督東陽豐二州諸軍事東揚
州刺史加侍中

永陽王伯智字策之太建中為使持節都督東陽豐二
州諸軍事平東將軍領會稽內史至德二年入為侍
中

新蔡王叔齊字子肅太建七年出為東中郎將軍揚州
刺史至德二年入為侍中

蔡景歷字茂世濟陽考城人高宗時遷宣惠豫章王長史帶會稽郡守行東揚州府事

隋楊昇平陳改東揚州曰吳州置總管府開皇十二年自工部尚書為吳州總管二十年終於官

宇文弼開皇二十年自代州總管為吳州總管大業元年八月己酉為刑部尚書而吳州遂改為越州

唐龐玉事隋為監門直閣李密據洛口玉以關中銳卒萬騎降高祖以隋舊臣禮之玉魁梧有力明軍法久

宿衛習知朝廷制度故授玉領軍武衛二大將軍使
衆觀以為模範為梁州總管巴山獠叛王梟其首賊
共斬渠長以降徙越州都督召為監門大將軍太宗
以耆舊令主東宮兵雖老不怠卒贈幽州都督工部
尚書

見新唐書按唐太守題名武德元年自右衛將軍授二年七月移揚州都督與此不合本府城

隍神相傳以為公死而為神以福此邦詳見祠廟門

李嘉武德三年授

闕稜武德四年六月自左領軍將軍授

李大亮自安州刺史授徙交州刺史在州寫書數百卷
委之解宇而去

田德平貞觀七年七月自鄜州都督授

馮大恩貞觀九年八月授

齊善行貞觀十七年九月自蘭州都督授

王奉慈永徽二年正月自潭州都督授移秦州都督

于德方永徽五年正月自原州都督授

段寶命顯慶三年六月自洛州長史授

唐同仁龍朔元年五月自虢州刺史授

劉伯英乾封元年五月自翼州長史授總章元年終於

官

李孝逸咸亨二年三月自常州刺史授移益州長史

李孝廉儀鳳三年二月自蘇州刺史授貶平州刺史

崔承福永淳三年二月自

闕

州刺史授

李思貞文明元年二月自婺州刺史授

郭齊宗光宅元年十月自左衛大將軍授

楊玄節垂拱元年六月自檢校并州刺史授

李奇容垂拱二年三月自奉裕衛副率授移幽州刺史
豆盧欽望如意元年三月自婺州刺史授召拜司賓卿

唐太守題名

云司農卿

錢節神功元年自揚州司馬授

蔡德讓大定元年自廣州都督授

竇懷貞長安四年自尚方監授移揚州刺史舊經云以

清幹著稱

龐貞素神龍元年五月自右衛將軍授

張合懃神龍二年七月自光祿員外卿授移徐州刺史

胡元禮神龍三年八月自蘇州刺史授移廣州都督

姚元之景龍元年十月自宋州刺史授移常州刺史

楊祗本景龍二年七月自陝州刺史授

尹正義景龍三年六月自宋州刺史授移相州刺史

王希雋景龍四年六月自相州刺史授召拜京兆少尹

王子麟開元二年自右衛中郎將授召拜光祿卿

栢臣範開元三年二月自殿中少監授移瀛州刺史

皇甫忠開元十年八月自杭州刺史授十一年移許州

刺史

鄭休遠開元十一年自汾州刺史授十五年去官

何鳳開元十六年自右領將軍授十九年五月替

張浚開元二十年自衡州刺史授二十一年移秦州都

督

裴鼎開元二十一年自金吾衛將軍授二十六年移衛

州刺史

元彥冲開元二十二年自襄州刺史授二十六年移衛

州刺史

敬誠開元二十六年自台州刺史授二十七年移廬州

刺史

秦昌舜天寶元年改刺史為郡守昌舜自通川郡太守

授六載移江華郡太守

杜庭誠天寶六載授七載移晉陵郡太守

張守信天寶七載自餘杭郡太守授

李處祐天寶九載自餘杭郡太守授

于幼卿天寶十三載自鄱陽郡太守授

崔寓至德元年自江夏郡太守授召拜給事中是年復

改州刺史

李希言乾元元年初置浙江東道節度使自禮部侍郎

授移梁州

獨孤峻自陳州刺史授加御史中丞召拜金吾衛大將

軍

呂延之自明州刺史授丁憂

杜鴻漸自湖州刺史授加御史中丞召拜戶部侍郎

按新

唐書本傳不載

趙良弼自廬州刺史授加御史中丞移嶺南節度使

王璵自揚州長史兼御史大夫授按唐本傳自淮南節

度使兼祠祭使徙浙東

薛兼訓自殿中監兼御史中丞授丁憂後加御史大夫

再知移太原節度使

陳少遊大歷五年廢節度使置都團練觀察使自宣歙
觀察使授八年遷淮南節度使

皇甫溫大歷九年八月自陝虢觀察使授

崔昭大歷十一年七月自宣州觀察使授是年廢都團
練觀察使以所管州隸浙西

王密大歷十四年自湖州刺史授建中元年復置都團
練觀察使二年復廢

韓滉自晉州刺史遷浙江東西觀察使檢校禮部尚書
元貞貞元二年十二月自楚州刺史授

皇甫政貞元三年二月自權知宣州刺史授十二年三
月改太子賓客

李若初貞元十三年三月自福建觀察使授十四年移
浙西觀察使

裴肅貞元十四年九月自常州刺史御史中丞授

賈全貞元十八年正月自常州刺史授

楊於陵永貞元年十月自華州防禦使授元和二年四月召拜戶部侍郎按唐本傳自華州刺史遷浙東觀察使越人饑請出米三十萬石拊贍貧民政聲流聞入為京兆尹

閻濟美元和二年四月自前福建觀察使授十月追赴闕

薛革元和二年正月自湖南觀察使授五年八月移浙西觀察使按唐本傳以治行遷浙西加御史大夫

李遜元和五年八月自前常州刺史授九年九月追赴
闕按唐本傳由衢州刺史以政最擢浙東觀察使當
貞元初福建軍亂前觀察使秦益兵三千屯於境以
浙閩衝遂為長戍遜署事即停之入為給事中舊唐
書云為政扶弱抑強境內稱理

孟簡元和九年九月自給事中授十二年正月追赴闕
按唐本傳以工部侍郎召

薛戎元和十二年正月自常州刺史授長慶元年九月

疾病去官按唐本傳所部州蠲酒禁者罪死橘未貢
先鬻者死戎弛其禁卒治為吏不尚約束詭名譽居
官無灼灼可稱者罷則懷之卒贈左散騎常侍

丁公著自禮部尚書翰林侍讀學士授長慶三年九月
追赴闕按唐本傳入為太常卿

元稹長慶三年八月自同州防禦使授大和三年九月
拜尚書左丞按唐本傳自同州刺史徙觀察使明州
歲貢蚶役郵卒萬人不勝其疲稹奏罷之舊經云所

辟幕職皆當時名士鏡湖秦望之遊月三四焉而諷
詠詩什動盈卷秩副使竇鞏海內詩名與稹酬唱最
多至今稱蘭亭絕唱

陸亘太和三年九月自蘇州刺史授七年閏七月移宣
州觀察使按唐本傳文明嚴重所到以善政稱

李紳太和七年自太子賓客分司東都授九年五月復
授太子賓客分司東都

高銖太和九年五月自給事中授開成四年閏正月追

赴闕

李道樞開成四年正月自蘇州刺史授

蕭倣開成四年三月自楚州團練使授會昌三年七月

拜給事中

李師稷會昌三年二月自楚州團練使授

元晦會昌五年七月自桂管觀察使授大中元年五月

追赴闕

楊漢公大中元年五月自桂管觀察使授二年二月追

赴闕

李拭大中二年二月自京兆尹授二年十月追赴闕

李褒大中三年自前禮部侍郎授六年八月追赴闕

李訥大中六年八月自華州防禦使授九年九月貶潮

州刺史

沈詢大中九年九月自前禮部侍郎授十二年六月追

赴闕

鄭處誨大中十二年七月自刑部侍郎授十二年移浙

西觀察使

鄭祗德大中十三年自太子賓客授

王式大中十四年自前安南經畧使授咸通三年六月
移武康軍節度使按唐本傳劇賊裘甫亂明越觀察
使鄭祗德不能討選式往代擒甫斬之加檢校右散
騎常侍餘姚民徐澤專魚鹽之利慈溪民陳瑛冒名
仕至縣令皆豪縱州不能制式曰甫竊發不足畏若
澤瑛乃巨猾也窮治其姦皆擄死咸通三年檢校工

部尚書徙武寧軍節度使舊經云甚有威畧惠政弟
龜復為刺史人皆舞蹈迎之

鄭裔綽咸通三年三月自權知秘書監授

楊嚴咸通五年九月自前中書舍人授六年二月追赴
闕

王颯咸通八年二月自前戶部侍郎授

李綰咸通十一年五月自中書舍人授十三年十一月
追赴闕

王龜咸通十三年十一月自同州防禦使授

裴延魯咸通十五年六月自中書舍人授

崔璆乾符四年閏二月自右諫議大夫知匭使授

柳瑫乾符六年十一月自給事中授

劉漢宏廣明元年十一月自宿州刺史授中和三年陞

為義勝軍節度使後為董昌所害

董昌光啟元年自杭州刺史破劉漢宏遂為義

勝軍節度使三年改為威勝軍乾寧二年削

除官爵

錢鏐乾寧三年以鎮海軍節度使兼領改威勝軍為鎮東軍

皇朝畢士安太平興國三年六月以右贊善大夫知是月移台州

李準太平興國三年六月以起居郎知五年十二月替

李孝連太平興國五年十二月以司農少卿知七年三

月丁憂罷

高適太平興國八年七月以殿中侍御史知雍熙三年

十二月二日替

闕

雍熙三年十二月以

闕

郎中知端拱二年十二

月闕日闕

薛智周端拱二年十二月以侍御史知淳化元年六月

二十日移婺州

韓闕

淳化元年六月以崇儀使知二年二月移闕州

盧文正淳化二年四月以侍御史知十月二日終於官
闕遂成淳化三年六月以太常博士知十二月丁憂罷
王柄淳化四年四月以職方員外郎知至道元年四月
移秀州

郭異至道元年四月以工部郎中知二年三月移京東
路轉運使

元玘至道二年五月以膳部郎中知咸平元年四月移
秀州

馮礪咸平元年四月以供備庫副使知三年三月替

裴莊咸平三年五月以度支郎中知五年八月替

康戩咸平五年九月以兵部員外郎知景德二年四月

替

關礪景德二年四月以職方員外郎知坐失舉離任

關巽大中祥符元年六月以職方員外郎知三年四月

替

關執大中祥符三年四月以祠部郎中知十二月移福

建路轉運使

李適大中祥符四年八月以度支員外郎知六年四月

替

皇甫選大中祥符六年四月以都官員外郎知八年四

月替

楊侃大中祥符八年四月以兵部員外郎直集賢院知

天禧元年二月替

陳靖天禧元年三月以兵部郎中直史館知四月移蘇

州

高紳天禧元年四月以刑部郎中直昭文館知三年七月二十六日去任

盧幹天禧二年十月以虞部員外郎知三年二月終於官

任布天禧四年四月以屯田員外郎知五年十一月移建州

燕肅天禧五年十一月以司封員外郎知六年十月移

明州

謝濤乾興元年十二月以吏部郎中直昭文館知天聖
三年十二月一日替

尹錫天聖四年三月以屯田郎中知九月移兩浙提點
刑獄

宋可觀天聖四年十二月以金部郎中知六年十一月
替

成悅天聖六年十一月以度支郎中知九年三月替

蘇壽天聖九年三月以比部員外郎知明道元年十月
移歙州

陳覃明道二年二月以都官郎中知景祐元年十月責
監潤州稅

葉參景祐元年十月以刑部郎中知二年七月替

趙賀景祐二年七月以右諫議大夫知十月移濠州

李照景祐二年十二月以刑部員外郎集賢校理知三
年十一月移明州

蔣堂景祐三年十二月以吏部員外郎知四年五月移
蘇州

郎簡景祐四年五月以右諫議大夫知寶元二年七月
替

范仲淹寶元二年七月以吏部員外郎知康定元年除
天章閣待制移永興軍

陸軫康定元年六月以工部郎中集賢校理知慶曆二
年七月替

向傳式慶歷二年七月以工部郎中直集賢院知四年

八月替

晁宗簡慶歷四年八月以刑部郎中知九月終於官

馬絳慶歷四年十二月以兵部郎中知六年十二月替

陳亞慶歷六年十二月以司封郎中知八年十二月替

富嚴慶歷八年十二月以太常少卿知皇祐三年正月

替

楊紘皇祐三年正月以刑部郎中知七月移荆湖南路

轉運使

魏瓘皇祐三年十月以給事中知四年六月轉工部侍郎充集賢學士移廣州

王達皇祐四年八月以工部郎中直昭文館知五年七月以遷葬去任

李兌至和元年六月以戶部郎中充天章閣待制知嘉祐元年六月改龍圖閣直學士移廣州

許元嘉祐元年十月以工部郎中充天章閣待制知二

年二月移泰州

張友直嘉祐二年四月以工部郎中充天章閣待制集賢殿修撰知四年七月終於官

刁約嘉祐五年正月以兵部員外郎集賢校理知六年十二月替

沈邁嘉祐六年十二月以右正言知制誥知七年七月轉起居舍人依前知制誥移揚州

張伯玉嘉祐八年四月以度支郎官知治平元年十二

月移福州

章岷治平二年八月以光祿卿直秘閣知四年五月移

福州

朱肱治平四年七月以太常少卿知十二月替

陳升之治平四年十二月以觀文殿學士尚書左丞知

熙寧元年正月移許州

鞠真卿熙寧元年四月以太常丞集賢校理知六月移

江西路轉運使

元絳熙寧元年八月以龍圖閣直學士工部侍郎知二年正月移荆南府

邵亢熙寧二年四月以資政殿學士給事中知十一月移鄭州

沈立熙寧三年四月以右諫議大夫知四年正月移杭州

孔延之熙寧四年四月以度支郎官知五年十一月召赴闕

謝景溫熙寧六年正月以工部郎中直史館知七年三月除直龍圖閣移澶州

張諷熙寧七年四月以司勳員外郎知七月移蘇州

趙抃熙寧八年四月以資政殿學士右諫議大夫知十年六月移杭州

程師孟熙寧十年十月以給事中充集賢殿修撰知元豐二年十二月替

丁竦元豐二年十二月以朝議大夫知四年十二月替

鄭穆元豐四年以朝散大夫集賢校理知六年七月管

勾洞霄宮

梁彥明元豐七年四月以朝議大夫知

穆珣元豐八年八月以中散大夫知元祐元年三月移

壽州

黃履元祐元年四月以龍圖閣學士朝請郎知二年四

月降授天章閣待制移舒州

章燾元祐二年八月以朝奉大夫知三年八月替

張詢元祐三年八月以朝散郎權發遣九月移福建路
轉運副使

錢勰元祐三年十一月以龍圖閣待制知

蔡卞元祐六年六月以龍圖閣待制知八年五月移潤
州

楊汲元祐八年六月以左朝散大夫充集賢院學士知
紹聖元年十一月復寶文閣待制移揚州

章衡紹聖元年七月以左朝議大夫集賢院學士知二

年十一月復寶文閣待制移揚州

張修紹聖二年十二月以朝散大夫知三年四月移明

州

邵材紹聖三年六月以朝散大夫知

翟思紹聖四年四月以朝散郎直龍圖閣知元符二年

二月移應天府

上官均元符二年九月以朝散郎知三年五月除秘書

少監

張琬元符三年六月以朝散大夫權發遣十二月移陝西提點刑獄

翟思建中靖國元年四月再以朝奉大夫直龍圖閣知九月除秘書少監

邵材建中靖國元年十一月再以朝奉大夫權知崇寧元年三月替

豐稷崇寧元年三月以樞密直學士朝散大夫知七月移常州

周常崇寧元年八月以奉議郎充寶文閣待制知十一月管勾江寧府崇禧觀

宇文昌齡崇寧元年十二月以左中散大夫充寶文閣待制知三年四月移杭州

詹文崇寧三年四月以朝散大夫直秘閣知

王資深崇寧四年四月以承議郎充顯謨閣待制知

方會大觀二年四月以朝請大夫充集賢院修撰知三年三月除徽猷閣待制知廣州十月再知政和三年

四月召赴闕

李圖南政和三年四月以朝奉大夫充顯謨閣待制知
十一月移廬州

呂益柔政和三年十一月以朝奉大夫充顯謨閣待
制知十一月移揚州

王仲疑政和四年八月以中大夫直秘閣知六年五月
召赴闕

劉韜宣和二年二月以大中大夫充徽猷閣待制知四

年五月召赴闕

章鯨宣和四年五月以朝奉大夫充直秘閣權發遣

宋昭年

闕

張汝舟宣和五年七月以降授宣教郎直秘閣權知發遣

鄭可簡宣和七年五月以朝散郎充右文殿修撰權知發遣

李邴靖康元年三月以奉議郎充徽猷閣待制知八月

召赴闕

翟汝文靖康元年十月以顯謨閣學士中奉大夫知建炎三年正月替

葉燠建炎三年正月以朝散大夫直顯謨閣知三月召

赴闕

李鄴建炎三年三月以奉議郎充徽猷閣待制知

傅崧卿建炎四年二月以朝奉郎直龍圖閣知四月移

婺州

陳汝錫建炎四年五月以朝請大夫直秘閣知紹興元年始升州為府二年正月罷

張守紹興二年二月以資政殿學士左中大夫知

朱勝非紹興二年七月以觀文殿學士左宣奉大夫知
當月召赴闕

王絢紹興二年九月以資政殿大學士左中大夫知四
年七月奉祠

綦密禮紹興四年八月以寶文閣學士左奉議郎知五

年七月奉祠

孟庾紹興五年七月以觀文殿學士左通奉大夫知六

年六月

闕

秦檜紹興六年七月二十八日以觀文殿學士左通奉

大夫知二十九日召赴闕

孫近紹興六年八月以龍圖閣學士大中大夫知十二

月召赴闕

趙鼎紹興八年十一月再以檢校少傅奉國軍節度使

兩浙東路安撫制置大使兼知是月罷

周秘紹興九年正月以徽猷閣直學士左奉議郎知十月四日奉祠

韓肖胄紹興十年五月以資政殿學士左奉議郎知閏六月奉祠

張守紹興十年八月再以資政殿學士左正議大夫知十一年四月召赴闕

孟忠厚紹興十一年六月以鎮潼節度使開府儀同

三司信安郡王判十二年四月充迎護徽宗梓宮禮儀使

樓炤紹興十二年十月以資政殿學士左朝奉大夫知十四年二月召赴闕

孟忠厚紹興十四年四月再以少傅信安郡王判十月充醴泉觀使

詹大方紹興十五年二月以龍圖閣學士左承議郎知十七年八月除工部尚書

林待聘紹興十八年二月以敷文閣直學士左朝奉郎
知十月奉祠

趙不棄紹興十八年十一月以敷文閣直學士右太中
大夫知十九年十月致仕終

俞侯紹興十九年十二月以敷文閣直學士右中大夫
知二十一年九月轉右通議大夫致仕終

湯鵬舉紹興二十一年十二月以左中大夫直龍圖閣
知二十二年三月罷

曹泳紹興二十二年六月以右朝請大夫直徽猷閣知
二十三年九月除直顯謨閣移臨安府

趙士璨紹興二十三年十月以左朝請大夫直敷文閣
知二十五年十二月罷

魏良臣紹興二十六年三月以資政殿學士左中大夫
知十二月奉祠

趙令詛紹興二十七年四月以左中奉大夫充秘閣修
撰知二十八年八月除戶部侍郎

王師心紹興二十八年八月以顯謨閣直學士左太中大夫知三十年八月移福州

宋槩紹興三十年八月以左朝議大夫充集英殿修撰知三十二年二月除敷文閣待制奉祠

湯思退紹興三十二年閏二月以觀文殿大學士左金紫光祿大夫知隆興元年三月奉祠

吳芾隆興元年八月以左朝請大夫充集英殿修撰知二年八月除權尚書刑部侍郎

徐嘉隆興二年十一月以左朝議大夫充敷文閣待制
知乾道元年正月罷

趙令諤乾道元年二月再以敷文閣直學士左太中大
夫知二年七月奉祠

洪适乾道二年十月以觀文殿學士左通奉大夫知四
年三月提舉臨安府洞霄宮

史浩乾道四年四月以觀文殿大學士左通議大夫知
六年四月除檢校少傅保寧軍節度使再任六月提

舉臨安府洞霄宮

蔣希乾道六年十月以觀文殿大學士左正議大夫知
八年正月提舉臨安府洞霄宮

方滋乾道八年二月以敷文閣直學士右太中大夫知
九年五月移平江府

錢端禮乾道九年六月以資政殿大學士左通議大夫
知淳熙元年六月除觀文殿學士二年四月奉祠

留正淳熙二年四月以顯謨閣直學士承議郎知是年

六月罷

張宗元淳熙二年六月以中奉大夫充敷文閣待制知
是年十二月差充大金賀生辰使淳熙四年正月除
在京宮觀

張津淳熙四年三月以敷文閣直學士中大夫知淳熙
五年三月召赴闕

李彥穎淳熙五年四月以資政殿學士通議大夫知淳
熙七年八月除宮觀

張子顏淳熙八年正月以敷文閣直學士太中大夫知
八月除顯謨閣直學士是年九月除在京宮觀

王希呂淳熙八年九月以朝議大夫知九年九月除敷
文閣直學士十年八月提舉隆興府玉隆萬壽宮

鄭丙淳熙十年閏十一月以龍圖閣學士太中大夫知
十二年九月除宮觀

丘富淳熙十三年正月以朝請大夫直龍圖閣權發遣
十四年四月除兩浙轉運副使

李彥穎淳熙十四年六月以資政殿學士通議大夫知
十二月除資政殿大學士提舉臨安府洞霄宮

鄭汝諧淳熙十四年十二月以朝散郎兩浙轉運判官
兼知十五年正月除直秘閣就知二十二日罷

張杓淳熙十五年二月以朝散郎集英殿修撰知五月
召赴行在

王希呂淳熙十五年六月以龍圖閣學士太中大夫知
洪邁紹熙元年二月以煥章閣學士宣奉大夫知

王信紹熙元年十二月以朝議大夫集英殿修撰三年
正月除煥章閣待制

趙不流紹熙三年三月以太中大夫祕閣修撰知紹熙
五年五月召赴闕

葉翥紹熙五年七月以顯謨閣學士中大夫知慶元元
年正月應辦孝宗皇帝梓宮有勞除龍圖閣學士五
月召赴闕

葛邲慶元元年七月以特進觀文殿學士判慶元二年

三月改判福州

單夔慶元二年五月以太中大夫顯謨閣待制知三年五月除華文閣直學士是年九月罷

劉穎慶元三年九月以朝議大夫充集英殿修撰知是年十一月移知平江府

張伯垓慶元三年十一月以朝請大夫除直華文閣知十二月除右司郎中

耿延年慶元四年正月自江東運副知是年三月應辦

憲聖慈烈皇后梓宮有勞轉中奉大夫六月丁母憂
汪義端慶元四年八月以朝奉大夫充集英殿修撰知
寧國府除華文閣待制知慶元五年八月職事修舉
陞徽猷閣待制是月丁母憂

沈作賓慶元五年十一月以朝請大夫試太府卿淮東
總領除直龍圖閣知六年二月轉朝議大夫三月除
兩浙路轉運副使

趙不迹慶元六年五月以朝議大夫司農少卿湖廣總

領除直寶文閣知嘉泰元年正月應辦光宗梓宮有
勞除華文閣待制是年三月移知潭州

袁說友嘉泰元年四月六日以寶文閣學士通奉大夫
知是年十一月三日召赴行在


李大性嘉泰元年十二月三日以中大夫試尚書戶部
侍郎華文閣待制知十二月二十三日到任二年正
月一日轉太中大夫三年三月十六日準省劄備奉
聖旨召赴行在

以後並見續志

守鄉郡

漢自嚴助朱買臣以邦人守郡見於史至後漢時又有
陳業晉則孔愉愉子安國愉孫靖謝輜虞潭宋以後孔
生坐弟靈符等皆是也至本朝康定元年六月工部郎
中充集賢檢理陸公軫軫來知州事朝士柳公植植以下三
十一人賦詩餞之於都門令刻石府學而宋景文公亭
餘內史流觴水路入仙人取箭山之句傳天下公將終

自草遺表有云乃睠明越之壤實控東南之隅特奉咨
俞薦專牧守仍賜金紫頓生光輝蓋公又嘗守明也後
九十二年建炎四年二月朝奉郎直龍圖閣傅公崧卿
來知州事及移婺州謝表有云病免帥藩恩移支郡是
也距今七十年未有繼者



會稽志卷二

欽定四庫全書

史部

會稽志卷三

詳校官監察御史臣沈孫璉

檢討臣德生覆勘

總校官知縣臣楊懋珩

校對官編修臣盧遂

謄錄監生臣陳元熙

欽定四庫全書

會稽志卷三

宋 施宿等 撰

節度使

唐節度使之名本起於西北用武之地如安西北庭河陽三城盧龍范陽鳳翔河中朔方之類以地名也河東河西淮南劍南東川劍南西川山南東道山南西道總數州為名也淄青澤潞之類合兩州為名也護國天雄宣武橫海昭德鎮西大同之類特創美名以寵其軍也

然大抵多在中原耳自唐末五代以來漸及東南為姑
息割據之術於是節鎮不勝其繁然猶各有支郡其後
四方僭竊則又擅置名號不錄於職方獨錢氏擅有兩
浙猶尊視中朝凡大事皆請命而中朝亦曲從之故境
內節鎮尤多用以命其子弟若杭之為寧海越之為鎮
東最其大鎮也久之自尊但為國王而以寧海鎮東兩
節授其子至其納土越州猶領鎮東軍節度而朝廷以
寵親王將相或外戚無歸鎮者

安撫使

初錢氏國除杭守帶鈴轄提舉兩浙路州軍兵甲賊盜而浙東限濤江議者以為非杭所能兼領皇祐三年十二月始分兩浙為東西兩路杭越守臣各兼兩路屯駐駐泊兵馬鈴轄而越守自魏瓘始歷五朝皆因之至宣和二年有方臘之變五月己亥臣寮言睦賊猖獗已見平靖慮班師之後餘孽尚在乞以杭越知州並兼本路安撫使鎮撫一方詔杭越州江寧府守臣並帶安撫使

此浙東安撫使之始也

國朝初止以安撫使命河北雄州守河東代州守其後陝西沿

邊亦有之寢及內地帥臣皆兼領

都總管

國初節度使領馬步軍都部署掌屯戍邊要訓練之政令以肅清所部英宗皇帝即位避御名改都總管其後守臣兼一路安撫使者皆帶馬步軍都總管浙東亦其一也

提刑司

宋興使者止有轉運使副使淳化二年置諸路提點刑
獄以朝官充此提刑之始也景德四年又置同提點刑
獄事以閣門祗候以上充皆察所部疑留獄訟勸課農
桑按其官吏之不法別其廉良以達於朝其後嘗再省
提刑然旋即復置而同提刑則屢廢不補雖置猶帶同
字故武臣常居文臣之次及乾道以後復置遂去同字
故武臣之權益重淳熙以後寔不復命矣

祖宗時又嘗以提刑兼勸

農使武臣提刑兼勸農副使後皆省去

元祐初罷提舉常平以其事來屬

建炎初亦如之紹興中復置提舉常平司乃復其故浙東提刑司治所在府治之東二百三十七步前臨運河與蓬萊館相望而武臣提刑則以添差通判廳為之其後武臣提刑既久不除乃復為通判東廳

提舉司

熙寧二年閏十一月壬子制置三司條例司言差官提舉諸路常平廣惠倉兼管勾農田水利差役事河東梁端謝卿材江西張次山湖南吳審禮喬叙湖北田君平

成都路李元瑜梓路吳師孟田祐利路王直溫張吉甫
夔路韓正彥張援廣東游烈廣西關杞福建嚴君貺詔
從之皆召對遣行或賜緋章服此提舉常平之始也元
祐初廢其官紹聖初復推行而設官亦如初方是時立
法甚嚴專以講補助之政秋毫不許他用上下共守之
至崇寧中始取以充學校養士之費也而居養院安濟
坊漏澤園至於花石應奉皆於此取以有執奏之法乃
降御筆免執奏提舉江東常平王瞻以為言朝廷為降

詔戒飭然終無益也侵蠹之餘至建炎初四方所積猶以億萬計會復罷提舉司所積頗為諸司侵取孫尚書覲時為給事中奏疏請復專置一司言路論擊孫公坐去國然議者終以為不當廢乃特置常平主管官一員隸提刑司實使之行常平司事但避提舉官之名久之乃併提舉茶鹽司提舉茶鹽司崇寧中所創置為提舉常平茶鹽司其名始正初置使合兩浙為一路治蘇州中徙杭州宣和末釐為東西二路東路使者定治於越見毛平仲所

誤題名記司治舊在府衙東一里紹興末嘗以賜皇姪
恩平郡王璩而遷提舉司於鎮東門外頗宏壯已而復
以新提舉司賜恩平而司復還其舊今治所是也

通判解舍

唐刺史雖有上佐然皆佐貳及方鎮權益重則佐貳尤
卑屈故大厯中杜子美至云治中實棄捐也藝祖有天
下首置諸州通判以朝官以上充實使之督察方鎮非
復唐上佐比故當日謂之監州典郡者至有欲求無通判

處建隆中初復湖南未逾月即命賈玘等分通判諸州
其委任之急如此太平既久其任稍削矣然著令猶不
許知州薦舉通判蓋祖宗遺意也越州舊止通判一員
及經駐蹕又為輔藩增至三四員亦嘗有不釐務者往
時謂三司副使為選通判為倅選倅皆副貳之名然唯
此兩官則稱之他雖副貳不可用矣謂通判為倅至今
猶然而三司副使廢已久世或不知選之名故併記之
通判北廳在府東六十步

通判南廳在府南六十四步

通判東廳在府東南八十五步

路鈐轄解舍

國朝置馬步軍副都部署觀察使以上充兵馬部署及

副部署皆橫班

今右武郎以上

諸司使

今武翼大夫以上

及刺史充都

鈐轄諸司使充都監

以闕

都監名皆稱為路分

閣門祇候以上充

凡此諸職國初亦有以文臣充者後乃專命武臣宣和三年五月己亥詔兩浙東路鈐轄皆視三路選差時初

平方臘也

路鈴轄解舍在府東北一里二百五十五步

正副將

元豐四年詔諸路團練給軍馬各置將副於東南置十三將淮南東路第一西路第二兩浙西路第三東路第四江南東路第五西路第六湖北路第七南路潭州第八全邵永州第九福建第十廣東路第十一西路桂州第十二邕州第十三各以兵隸之給虎符為驗其兵不

滿三千人惟置單將

熙寧十年詔總門封府京畿東西河北路兵分置將副自河北始自

第一將以下十七將在京畿自第二十五將以下九將在京東第三十四將以下四將在京西合三十七而廊延環慶隰原秦鳳熙河又各列將合四十二總天下為九十二將至是始定其制後詔諸路兵以本軍才武為三等及置部將隊將押隊訓練次諸將佐春秋都試擇武力士千人內選十人皆以名聞待旨解發其願留鄉里者勿彊遣也

凡正副將皆選內殿崇班以

上嘗歷戰陣親民者充之仍許監司奏舉職制令將副訓練約束措置兵政軍情不便違法聽州縣長吏覺察以聞今府將兵額三千人東南第四正副將各一員

官制舊典云王荆公建言分籍諸路兵道一路團結今東南將乃其遺制元豐中將兵法行荆公已罷相矣時北人求忻代地富鄭公言因勑置將兵遂生邊隙宜罷之便張文定公又言使敵人有以測知中國之兵數也後竟不果罷今百餘年蓋制軍之良法也

都監

都監自府州軍監至縣鎮城寨關堡並以閣門祗候以上充亦參用三班使臣監押則專用使臣而已都監監押悉充在城巡檢始其任頗重後寢衰削矣

三司屬官

安撫司

舊制都部署都總管司有參謀官兵馬鈐轄司有機宜
文字走馬承受公事或不常置後罷承受公事置管
勾官中興後創置參議准備差遣准備差使管勾改
為幹辦機宜有主管有書寫一路多至十餘員而書
寫一員例辟其子弟親屬為之後議者以諸司屬官
員多宜省尋廢參謀官准備差遣差使乃罷辟差書
寫惟存參議主管機宜幹辦公事員外置各二員而

添差參議官獨不釐務

提刑司

部使者之屬舊有勾當官然不常置今幹辦公事乃其職也浙東路提刑司幹辦公事一員或雙員檢法官一員銓法注試中刑法或曾歷法曹掾人

提舉司

熙寧初置諸路提舉常平農田水利差役崇寧中置提舉茶鹽事紹興中併二司為一舊有勾當公事一員

於文臣通判幕職內選差如一路十州軍許差雙員
後改幹辦公事今茶鹽常平司各一員

職官曹解舍

國朝大都督府官屬之制有長史左司馬右司馬錄事
參軍司戶參軍司法參軍司士參軍司理參軍大都督
闕則置知府一人通判一人而長史司馬皆省節度兼
觀察處置等使官屬之制有行軍司馬節度副使節度
判官節度掌書記節度推官觀察判官觀察支使

有掌
書記

則觀察推官其實大都督節度觀察使職務悉歸知州省
通判兼總之此越州州官舊制之大略也若防團州以下
其制殺減不同矣崇寧四年始命諸州分六案以仿
尚書省六曹然官名猶未改也政和二年乃議分曹建
掾猶修改久之乃定有司錄事有司士曹事司戶曹事
司儀曹事司刑曹事司工曹事以上為曹官有士曹掾戶曹
掾兵曹掾刑曹掾以上為掾官司錄曹官承務郎以上掾官
並差將仕郎建炎元年九月詔州郡曹掾官改從舊制

司錄依舊為簽判曹掾依舊為推判官文使書記錄事
參軍司理參軍司戶司法參軍先是曹掾比舊既增員
吏額亦從而增至是又詔人吏亦減三之一擇不才多
過犯者罷之

簽書節度判官廳公事解在府治之西南二百七十
步

觀察判官解舍在府治之南二百六十六步
觀察推官解舍在府治之東北一里二百十步

錄事參軍廨舍在府治之西南宣詔亭下府院在焉
司理參軍廨舍在府治之南獄在焉

司戶參軍廨舍在府治之東南一里一百十步

司法參軍廨舍在府治之東南二里一十步

縣令長

會稽

唐李俊之開元中為會稽令縣東北有防海塘自上虞
江抵山陰百餘里以瀦水溉田俊之增修焉民賴其

利其後令李左次又增修之

李左次

見上

竇伯元河南洛陽人會稽令

李堯年常山人會稽令

王濂字瀑源臨沂人會稽令

孫孝哲清河人會稽令

已上四人見
宰相世系表

吳繇乾寧初為會稽令威勝軍節度使董昌反召繇問
策繇曰王真諸侯遺榮子孫而不為乃自取滅亡昌

怒叱出斬之併族其家

本朝曾公亮字明仲泉州人舉進士第五人以太常寺奉禮郎知會稽縣事初試吏聽獄決訟吏莫敢欺縣有鏡湖溉民田湖溢反為田病公亮即曹娥江隄疏為斗門泄湖水入江田不病後相三朝官至太傅魯國公贈太師中書令謚宣靖配饗英宗廟廷

山陰

吳朱然為餘姚長遷山陰令加折衝校尉督五縣孫權

奇其能以為臨川太守

吾粲字孔休吳郡烏程人與同郡陸遜齊名為山陰令
後至會稽太守

晉沈叔任吳興武康人少有幹質為山陰令大有治聲
後為益州刺史

王鎮之字伯重琅邪臨沂人歷剡上虞令並有能名會
稽內史謝輜請為山陰令復著殊績

魏顓字長齊會稽人世稱四族之雋仕至山陰令

徐豁字萬同東莞姑幕人元嘉初為尚書左丞山陰令精練法理為時所推後為始興太守廣州刺史卒

傅琰字季珪遷山陰令尤以明察著名遷尚書左丞及子琰

傅琰字季珪遷山陰令尤以明察著名遷尚書左丞及齊太祖輔政以山陰獄訟煩積復以琰為令有賣針賣糖二姥爭團絲詣琰琰縛團絲於柱鞭之密視有鐵屑乃罰賣糖者又二野父爭雞琰各問何以飼雞一

人云豆一人云粟破難得粟罪言豆者縣內稱其神明琰父子並著奇績江左鮮有世云傅氏有治縣譜子孫相傳不以示人後為廬陵王長史南郡內史行荊州事

孔僉會稽山陰人自五經博士為山陰令

齊沈憲吳興武康人少有幹局歷烏程令太祖以山陰戶衆難治欲分為二縣世祖啟曰縣豈不可治顧用不得人爾乃以憲帶山陰令治聲大振孔稚珪請假

東歸謂人曰沈令斷事特有天才後為散騎常侍孫
浚

沈浚字叔源博學有才幹仕梁歷山陰吳建康三縣並
有能名累遷御史中丞

周顥字彥倫汝南安城人建元中為山陰令

劉玄明臨淮人有吏能為山陰令大著聲績傳琰子翹
代之

傅翹

見上

王詢永泰初為山陰令太守王敬則將舉兵反召詢問
吾欲發丁丁可得幾人傳庫物錢有幾詢答縣丁卒
不可得傳庫物多未輸入敬則怒將出斬之乃起兵
過浙江

丘仲孚字公信吳興烏程人王敬則反以拒守有功遷
山陰令居職甚有聲稱百姓為之謠曰二傅沈劉不
如一丘前世傅琰父子沈憲劉玄明繼宰山陰並有
政績言仲孚皆過之也梁武帝即位著令小縣有能

遷大縣大縣有能遷二千石仲孚於是擢為內史

梁謝岐會稽山陰人為尚書金部郎山陰令侯景亂岐
寓東陽景平依張彪彪在吳郡及會稽庶事一以委
之

沈僧昭吳興武康人為山陰令

劉蕘東莞莒人為山陰令

王淮之字元魯琅邪臨沂人為山陰令有能名預計盧
循以功封都亭侯

江統字應元陳留圉人山陰令

于寶字令升新蔡人領國史補山陰令

宋張岱字景山吳郡吳人為司徒左曹掾累遷山陰令
職事閑理時人稱之

顧凱之字偉仁吳郡吳人為山陰令邑素號繁劇前後
官長晝夜不得休事猶不舉凱之理繁以約縣曹無
事晝日垂簾門庭閒寂自宋世為山陰令務簡績修
莫能尚也還為尚書吏部郎卒官湘州刺史

江秉之字元叔濟陽考城人歷烏程建康令遷山陰令
民戶三萬訟訴殷積堦庭常數百人秉之御煩以簡
處之晏然以在縣有能補臨海守

陸邵景平初為山陰令富陽賊孫道慶等攻沒縣邑直
抵山陰會稽太守褚淡之自假淩江將軍以邵領司
馬邵與行軍將軍漏恭期合力大破賊於柯亭

陳褚玠字溫理大建中為中書侍郎時山陰多豪猾前
後令皆以賊汙免宣帝患之以玠清廉有幹用遂擢

為令縣人張次的王休達等賄賂通姦全丁大戶多有隱沒玠乃鎖次的具狀啟臺宣帝手勅慰勞並遣使助玠搜括所出軍人八百餘戶時曹義達為宣帝所寵縣人陳信諂事義達信父顯文恃勢暴橫玠執顯文鞭之吏民股慄莫敢犯者

唐韋友順京兆人山陰令

見宰相
世系表

張遜乾寧初為山陰令董昌反自號大越羅平國改元順天署置百官召遜知御史臺遜固辭曰王自棄為

天下笑且六州勢不助逆王據孤州祇速死耳昌怒
曰遜不知天意以邪說拒我囚之他日謂人曰我縱
無遜何乏於事乃害之

剡縣

吳卜靜字玄風吳郡人為剡令

賀齊字公苗山陰人為剡長縣吏斯從為奸立斬之從
族黨遂相糾合千餘人攻縣齊開城門突擊大破之
晉周翼郝鑒外甥少遇飢亂賴鑒得存郝亡翼為剡

令解職歸心喪終三年後歷青州刺史少府卿卒

謝奕字無奕陳郡陽夏人少有器鑒郡太尉掾為剡令
有一老公犯法謝以醇酒罰而遣之累遷豫州刺史
追贈鎮西大將軍

李弘度常嘆不被遇殷揚州知其家貧問君能屈志百
里否李答曰北門之嘆久已上聞窮猿奔林豈暇擇
木遂授剡縣令

殷曠之仲堪子有父風仕至剡令

宋王鎮之字伯重祖者之位中書郎父隨之上虞令鎮

之為剡令並有能名

宋武帝時

周顒字彥倫宋明帝頗好玄理以顒有辭義引入殿內
親近宿直帝所為慘毒之事顒輒誦經中因緣罪福
亦為之少止元徽中為剡令有恩惠百姓思之

齊張稷字公喬幼有孝性母疾時稷年十一侍養衣不
解帶每劇則累夜不寢及終毀瘠過人杖而後起州
里謂之純孝齊永明中為豫章王嶷主簿以貧求為

剡令會山賊唐寓之作亂稷率屬部人保全縣境

梁王懷之剡令

張彪傳

陳徐陵剡令

唐張子胄剡令

本朝丁寶臣字元珍晉陵人進士起家以太子中允來
知縣事始至流大姓一人除弊興利甚衆其歿也王
荆公誌墓

諸暨

吳陸凱

已見蕭山門

齊卞彬字士蔚建武末為諸暨令

梁蕭眎素性靜退少嗜慾好學能清言榮利不關於中
喜怒不形於色天然簡素累遷中書侍郎在位少時
求為諸暨縣令到縣十餘日挂衣冠於縣門而去

裴子野為諸暨令不行鞭罰民有爭者示之以理百姓
稱悅合境無訟

唐李罕諸暨令

本朝丁寶臣已見剡縣其治諸暨如剡越人滋以為循吏

蕭山

吳陸凱字敬風吳郡人丞相遜族子也為永興諸暨長所在有治迹

吳書

晉王雅字茂達東海剡人補永興令以幹理著稱

本傳

本朝杜守一景德二年以大理丞知先是縣東五里有虎守一為政之二年虎負子西渡浙江而去鄉人相

賀名其里曰去虎里

郭源明字潛亮嘉祐六年知蕭山縣縣之宿豪有父子為奸利者悉置於法民有育孤女利其貲過時不嫁者諭以禮律女遂得所歸太守刁景純約聞之曰郭蕭山厭民望矣

餘姚

吳朱然嘗與孫權同書學結恩愛至權統事以然為餘姚長時年十九後遷山陰令

朱亘為餘姚長遇疾疫穀食荒貴分部良民隱視醫藥
飡粥相繼士民感之

晉山遐為餘姚令時江左初基法禁寬弛豪族多挾藏
戶口以為私遐繩以峻法到縣八旬出口萬餘

孫統為餘姚令性好山水居職不留心碎務縱意游肆
名山勝川靡不窮究

闕名 字恩充選補太學博士出為餘姚令

謝勝為餘姚令王羲之臨河叙曰餘姚令謝勝等十五

人不能賦詩罰酒各三斗即蘭亭之會也

見劉孝標世說注石

本蘭亭詩作前

餘杭令謝藤

宋韓景之為餘姚令

張永為餘姚令有稱績

劉仲道為餘姚令

明震為餘姚令

梁沈瑀字伯瑜吳興武康人為餘姚令縣大姓虞氏千餘家請謁如市瑀以法繩之又縣南豪族子弟縱橫

瑤召其老者為石頭倉監少者補縣傭權右屏跡
劉杳為餘姚令在縣清潔湘東王發教褒稱之

唐李穩為餘姚令

李惇為餘姚令

本朝謝景初字師厚陽夏人其知餘姚縣也宛陵先生
梅聖俞以詩送之略曰我從淮上歸君向海濱去安
知無幾舍邂逅不相遇頗如飛空雲到月不得附月
行既不留雲亦值風故師厚故知制誥希深絳之子

弟師直景溫師同景年師復景回皆知名士諸子悵
惜亦皆有名師厚詩極高豫章黃魯直娶其女自以
為從師厚得句法而師厚之姑實歸聖俞觀送行詩
其淵源所從來遠矣今後進乃有詆訾聖俞者至以
為不可不觀者陳無已詩不可觀者聖俞詩豈不陋
矣哉故略為辨之

上虞

後漢度尚為上虞長為政嚴峻明於發摘奸非吏人謂

之神明

吳顧雍為上虞長有治迹

濮陽興為上虞令後為會稽太守位至丞相

劉綱為上虞令師事白君受道歷年道成與妻樊夫人俱升天而去

晉顏含為上虞令簡而有恩明而能斷然多以威御下
傅晞為上虞令甚著政績

周鵬舉為上虞令

華茂為上虞令與王右軍會蘭亭賦四言詩

徐祚之為上虞令

王隨之為上虞令

宋王鎮之為上虞令有能名

虞季為上虞令

卞延之濟陰冤句人弱冠為上虞令有剛氣會稽太守

孟顗以令長裁之積不能容脫幘投地曰我所以屈

卿者政為此幘耳今已投之卿矣卿以一世勲門而

傲天下國士拂衣而去

王晏為上虞令孔覲自會稽發兵反晏起兵攻郡覲率
千人趨石澗竄於山嶠村村人縛以送晏斬之東閣
外

齊周洽為上虞令廉約無私

進士

晉史謂會稽有佳山水名士多居之王羲之晚渡江遂
有終焉之志顧愷之謂千巖萬壑競秀爭流而一時人

物如孫綽李充賀循許詢輩皆文藝冠世

說友幼讀史

長而從仕謂今會稽實供行闕仕而有職於東蓋無難者亦庶幾見所謂以山水名天下與人物風流之盛者乎而宦海萍遊迄三十年而志弗遂淳熙十六年春始得辱秉傳典倉事於是登秦望探禹穴識其委蛇盤礴之觀而得其溫厚粹美之氣蓋其鍾靈孕秀雲行川流胚胎蘊釀發而為英傑宜有獨盛於斯世者國朝崇儒右文眎古為重而東南儒風宏楙盛美會稽為最焉杜祁

公以道德文章功業行實克相昭陵德在生民勲在史

冊足以儀萬世而垂後學如李公光入參大政孫公沔

晉貳樞筦顧公臨典制北門陳公揚庭執法中司傅公

墨卿正位常伯陸公佃石公景畧皆以文學冠春官夏

公靈齊公唐皆以賢良應大科傅公崧卿以藝魁舍選

儒學之秀頡頏上下此非騫翔奮厲之所蘊而雄深秀

麗之所鍾耶建炎初六飛渡江嘗駐蹕於越而越今為

陪都蓋古三輔也山川之所形見風化之所漸被其儒

風士業流聞彰布益以昌大要非餘郡可比王公佐詹

公駿相望二十餘年之間皆以大策冠多士王公俊石

公延慶莫公叔光皆以進士中宏博石公公輒以奏恩

擢魁名而三歲大比賜第於太常者率十餘人其連取

世科伯仲聯第者又間見層出人物之茂實為衣冠盛

事其亦有以權輿於此哉郡之前進士石朝英陸津張

澤闔辭以告說友曰越之山川則有郡之圖志在越之

名卿才大夫則有國之信史在若無俟於登載者然鄉

之宗老則懼晚學之未聞也人寢遠而寢忘事愈久而

愈隆其不沒前人之事者幾希

朝英

等將以郡之進士

列名於石且請於府帥閣學尚書王公願飭工鑱石寘

諸郡庠之講堂於以示勸激之意然非文不傳也敢以

請

說友

幸以將指來越而楚實有材又所深見而目識

者其何可辭則與之言曰夫讀古人之書肄當世之業

豈止取科級釣爵位以夸榮侈盛於鄉曲哉其致君澤

民行道及物實自讀書肄業始漢世設科射策勸以官

祿史氏譏之韋氏教子一經志於青紫後世貶焉士之學固有遠者大者今天子龍飛御天適當興賢之歲越之士將企前慕昔以接踵賢躅而振袂流風者其蓋思所以遠者大者乎雖然越有君子六千人昔人謂其有志行猶齊之士吳之賢良也嗚呼千載之後其必有仍盛美於前人者說友猶拭目以觀之題名起於慶曆二年前乎此者攷諸登科記則鄉里多不載故不書而杜初公則大中祥符元年甲科四名進士蓋可攷云是年

十一月望日朝議大夫權兩浙西路提點刑獄公事袁
說友記

題名舊刻始於慶厯用登科記修也前此記不詳其
鄉里故雖初公亦不復書闕所不知是固未害然初
公不書何以寓高山景行之瞻教授劉君_庶請於府
帥待制侍郎單公_夔礪舊石而增修之訪遺逸於邦
之長者得陸公_軫以下凡七人遂列初公於其首自
建隆開國距慶厯餘八十年其間策名多矣未易攷

也仍存闕疑之義自慶厯至今百五十餘歲登載日
益盛今年上以孝廟故未親策多士而莫君于純實
為南宮第一三魁相望於四十餘年之間是碑重修
其風遠矣介既為書舊記於碑首復叙大略以輔教
事慶元丙辰臘月既望承議郎添差權通判紹興軍
府兼管內勸農事王介書

姓氏

舊經載會稽之姓十四而不著其望之所出按氏姓書

及書傳所載其望實出會稽者虞夏茲資駱五氏而已
孔謝朱賀鍾離雖不云望出會稽而世居此者皆有顯
人鍾氏粗有所見而榮俞戚三氏於此未有聞焉康莊
闕留搖黃裘皆望出會稽而舊經不載總之凡二十有
一今併考姓氏所自出與其昔之聞於世者疏於後然
會稽今官學最盛者杜氏石氏陸氏唐氏諸葛氏等各
自有譜故不復出

虞氏帝舜之後商有虞仲實出太王之後子孫亦氏虞

史記有趙相虞卿漢有虞延吳有會稽虞翻及唐虞
世南望出會稽陳留

夏氏夏后氏之裔或云陳宣公之後有夏徵舒故其後
亦以夏為氏後漢有夏馥夏牟晉有會稽夏統望出
吳郡會稽本朝夏竦為樞密使竦子安期為龍圖閣
直學士又有賢良夏噩亦以文稱

孔氏衛之孔氏出於孔達鄭之孔氏出於子孔吾夫子
乃出於宋之孔父嘉前漢有孔光孔安國後漢有孔

融晉有孔愉融與愉皆自以為出於夫子之後愉之
先世避亂徙居會稽遂為會稽人孔靖孔淳之等皆
其後也本朝有孔道輔為御史中丞有直聲孔旼居
汝州以隱操聞於慶厯中皆夫子之後

榮氏左傳有榮駕鵞孔子弟子榮旂列子有榮啟期北
史有榮毗唐有郎中榮九思本朝有榮諲為光祿卿
榮疑為將作監望出樂安

謝氏炎帝之後周申伯食采於謝因而氏焉後漢有謝

夷吾謝奉皆會稽人東晉謝安本朝太子賓客謝濤
濤子絳知制誥絳子景初景溫景平景回景初子棕
惜皆知名望出陳留

鍾氏出潁川左傳有鍾儀漢有鍾興鍾皓魏有鍾繇南
史文學傳有鍾嶸唐有鍾紹京江南有禮部侍郎會
稽鍾謨本朝有鍾傳為西帥鍾世美以工書見拔擢
茲氏左傳魯大夫茲無逸今望出會稽

俞氏出姓苑古有俞附善醫今望出河間南史孝義傳

有俞僉唐有俞文俊江寧人本朝龍圖閣待制俞獻可弟刑部侍郎獻卿新安人

戚氏衛大夫食采於戚因氏焉漢有臨轅侯戚鯁南史儒林傳有戚袞本朝睢陽人戚同文號正素先生子維為職方郎中綸為樞密直學士望出齊郡其後儒學世有人或問魯南豐以宋之世家南豐以戚氏對資氏黃帝裔孫有食采於資者後以為氏姓纂漢有資成南陽人望出陳留會稽

駱氏姓苑云吳有東陽駱統唐駱賓王望出河南會稽
本朝駱偃登進士第

朱氏出沛郡義陽吳郡河南四望本自高陽之後封於
邾後為楚所滅乃去邑氏朱焉范蠡去越改姓朱曰
陶朱公子孫亦或以朱為氏史記有朱亥平原君朱
建漢有會稽太守朱買臣會稽朱雋及宋朱百年

賀氏齊之六族慶封之後漢有侍中慶純避安帝諱改
為賀氏吳賀齊賀劼唐賀知章皆會稽人望出河南

廣平知章之後有鑄以詩文得名於元祐中自稱鑑湖遺老又有道士賀仲清者會稽人亦自言知章之後紹興中猶在

鍾離氏漢有鍾離昧會稽鍾離意及吳志有鍾離牧鍾離徇舊經有鍾離表皆郡人紹興中有鍾離松仕至朝請大夫致仕高宗慶壽松以耆老聽再仕力辭

康氏周文王子衛康叔之後又梁有康絢其先出自康居初漢置都護盡臣西域康居遣子入侍待詔河西

因留不去其後遂氏焉晉亂遷於藍田唐儒學傳有
會稽康子元本朝有兵部員外郎知越州康戩建炎
中有康執權為中書舍人允之浙西安撫使知杭州
望出會稽東平京兆唐康日知靈州人有功深趙封
會稽郡王子志睦會稽郡公孫承訓會稽縣男

莊氏楚莊王之後以諡為姓六國有莊周望出會稽東
海天水至後漢避顯宗諱改氏嚴嚴光本亦姓莊乃
後人追改以避諱也又前漢有嚴忌嚴助望出馮翊

闕氏左傳齊大夫闕止吳有闕澤會稽人北史有闕駟
唐有闕稜本朝尚書郎闕洞望出會稽天水

留氏出自會稽本衛大夫留封人之後漢功臣表疆圉
侯留盼其後避地山陰遷居東陽陳將軍留贊留異
五代留從効為泉州節度使

搖氏姓苑云句踐之後有東海王搖子孫以為氏漢
功臣表有海陽侯搖母餘望出會稽

黃氏姓苑云句踐之後封於黃因以為氏或云亦嬴姓

十四氏之一也楚有春申君黃歇漢有夏黃公大司
農黃昌皆會稽人及黃霸黃憲三國黃忠黃蓋望出
會稽江夏按黃氏所在有之然仕至丞相者惟西漢
黃霸及高宗初黃潛善二人相距千五百年

裘氏出姓苑衛大夫食采於裘因以為氏望出渤海號
略姓纂云會稽有裘氏今會稽有旌表門閭裘氏別
見

會稽志卷三